

Esta'

Ho mangià un persich d'la vigna
puntigià fora da russ,
la pulpa, denta, sanguigna;
pûssé mar che duls,
cald da sul, profûmà
dal sentur fort d'l'està.
Al pèl ratin am faséva ghlit
sû i lavar, am faséva rit
propì cume alura
quand nûn, la bassura,
'na cubia d'fioeui e fioli
turna andavan par i vigni
a rubà frûta, sû i prà a fà scurnoli.
Renta al funtanin gh'eran do brigni,
a pé d'una costa, int'un vignot,
'na gamba gh'era d'ûga d'sant'Ana:
la fasevan nèt in quatar e quatrot;
mìa un sgrassaioeu vansavan, mìa una grana.
I persich pûssé giandla che pulpa,
i fich d'la stissa duls e brûsent
che tût ass mangiava: pèl e piculin.
S'eran rangià pecc di sturnin!

Rubà frûta l'era mia pecà, la culpa
l'era dal cald, dal sul, d'l'està!
Giò peu da scorsa a scurnoli, a salton
par i prà, travèrs di cutûri,
spinass int'i scèss di muri,
sgarblàss i gambi int'i stubii
ciuch da sul e da libertà,
fina a che strach, cunt'al banfon,
cercavan l'umbrìa scûra d'un muron,
l'umbrìa frèscia di pûbii;
renta 'na rugia d'acqua ciara
s'bûtavan giò lungh, a guardà 'l ciel
tûti citu, cume strià
da cul'aria fèrma e rara
d'un mund ca sméiava pitûrà.
L'udur cald da fen, d'avii, da mél,
da frûta che dasi ass crepava
al calur dal sul ca sa sbassava,
al bataclan di mûsican d'l'està,
i scigali sempar in fèsta,
im fasevan girà la tèsta,
m'imbalurdivan, ma sturnivan...
Calda da sul, duls da frûta
ma stiravi tûta,
cuntenta, senza savél, da véss viva
int'a cul mument, in cul'età

che rubà frûta l'è mia pecà.